

Pahang tidak halang Himpunan Hijau - MB

15 Februari, 2012, Rabu

Sumber : Utusan Malaysia

KUANTAN 14 Feb. - Kerajaan negeri tidak menghalang kehadiran kira-kira 20,000 orang yang akan menyertai Himpunan Hijau 2.0 di Padang Majlis Perbandaran Kuantan (MPK) 1 di sini pada 26 Februari ini.

Menteri Besar, Datuk Seri Adnan Yaakob berkata, kehadiran mereka akan disambut dengan tangan terbuka kerana ia menambahkan lagi sumber pendapatan buat peniaga dan pengusaha hotel di bandar ini.

"Mustahil mereka yang datang tidak berbelanja, makan dan menginap di hotel, jadi ia boleh meningkatkan pendapatan golongan peniaga. Kalau boleh kita galakkan lebih ramai yang datang. Lebih ramai lebih bagus, jadikan ia seramai 30,000 orang datang ke perhimpunan tersebut," katanya.

Beliau berkata demikian selepas majlis penghargaan penyampaian cek kerajaan negeri kepada 12 penerima yang menjadi pelapor kesalahan rasuah di bawah Seksyen 17 (b) Akta Suruhanjaya Pencegahan Rasuah Malaysia (SPRM) di sini semalam.

Adnan berkata, Malaysia merupakan sebuah negara demokrasi dan rakyat bebas melakukan aktiviti asalkan ia tidak melanggar undang-undang serta menggugat ketenteraman orang ramai.

"Mungkin selepas ini ada pula tunjuk perasaan 40,000 orang yang membantah dan melawan balik mereka (Himpunan Hijau), jadi ia sekali gus meningkatkan lagi pendapatan peniaga," katanya secara sinis.

Ketika ditanya sekiranya penjawat awam mahu menyertainya Adnan berkata, ia bergantung pada kebenaran ketua jabatan masing-masing.

Sementara itu, Adnan mengakui populariti Perdana Menteri, Datuk Seri Najib Razak melebihi populariti UMNO dan Barisan Nasional (BN).

Justeru, beliau menyeru semua wakil rakyat serta pemimpin komponen BN meneruskan tugas masing-masing dengan mendekati diri kepada rakyat untuk meningkatkan populariti mereka.

Menurutnya, jika dapat dilakukan ia akan memudahkan tugas dan usaha Perdana Menteri sebagai pemimpin parti dalam memenangi hati rakyat.